

A FONTE ORAL

Un recurso didáctico para traballa-la historia recente da localidade

Luis M Llorente de Mata

M. Concepción Iglesias González

Ourense

1. INTRODUCCIÓN

A proposta de traballo que presentamos a continuación está referida ó traballo con historia oral. A fonte oral é un elemento destacado para poder traballa-la historia recente dunha localidade, pois permite descubrir para os alumnos sorprendentes elementos de cambio: a chegada da electricidade, o teléfono ou a televisión; o *antes* e o *despois* dos costumes familiares, a xeralización de certos adiantos; etc.

Con esta documentación oral pretendemos obter unhas referencias temporais que poden abrancar a maior parte deste século. Estas referencias concretas aportan información sobre as condicións de vida e traballo, nas súas múltiples facetas, da época obxecto de estudio. Permiten, ademais, compara-la sociedade actual e aquela da que nos falan as fontes, e analiza-las distintas causas polas que se produciron eses cambios.

O traballo con historia oral ten unha serie de *vantaxes* evidentes: promove o debate e a cooperación; axúdalle ós nosos alumnos a desenvolve-la súa capacidade da linguaxe, un sentido da evidencia, a súa conciencia social e as aptitudes mecánicas; e propicia o desenvolvemento dun espírito crítico, participativo e solidario. Para os profesores de historia, é un medio de introducir nas aulas o estudio da historia local.

A un nivel elemental, ó recoller anécdotas e memorias de como era ou como vivía a xente no pasado, por rudimentaria que poída se-la técnica de entrevista ou gravación, os nosos alumnos están recollendo unha evidencia. Ó mesmo tempo, implícanse creativamente na valoración da mesma e enfróntanse a cuestións básicas: cando confiar na información ou dubidar dela; como organizar un conxunto de feitos. Experimentan, a nivel práctico, a historia como un proceso de recreación do

pasado, coa oportunidade única de elabora-lo seu propio fragmento dela.

Durante o proceso desenvolven, en primeiro lugar, a indagación. Despois que os alumnos empezan a entrevistar, aparece a necesidade e o desexo de averiguar máis cousas por outras fontes.

Logo, poden encontrar un importante apoio no desenvolvemento das súas capacidades lingüísticas, tanto orais coma escritas. Antes de entrevistar, os nosos alumnos e alumnas deben discutí-la mellor maneira de formula-las preguntas que poden facer. Mientras entrevistan, deben aprender a escutar a outras persoas e captar exactamente o que éstas lles queren comunicar. Isto pode esixir unha intensa concentración. Sen darse conta, enfróntanse ós problemas de comprensión e interpretación que o libro ou caderno de exercicios de lingua tratan de estimular.

Tamén adquirirán destrezas técnicas no manexo de aparatos, como poden se-las gravadoras, elaborando unha cinta con extractos de gravacións, combinando diapositivas con son, editando folletos con fotografías e transcricións, ou traballo que fagan uso destes medios convolutamente.

Finalmente, poden aprende-las aptitudes sociais básicas. A través da entrevista mesma, os alumnos poden desenvolve-lo tacto e a paciencia, a capacidade de comunicarse, de escutar ós demais e de facer que se sintan a gusto, o que é necesario para procurarse información. Poden obter unha imaxe

viva de como era a vida no pasado, pero tamén unha más fonda comprensión de como poden ser outras xentes, que teñen unhas experiencias, no pasado e na actualidade, distintas das súas propias. Así, pódelles axudar a comprender ós demás e a experimentar unha empatía para con eles; e tamén a confrontar uns valores e unhas actitudes ante a vida que poden ser contrapostos.

Sen embargo, non podemos negala evidencia: a historia oral ten tamén as súas *limitacións*. En primeiro lugar, non se pode ir demasiado lonxe no tempo; hai unha clara deformación da memoria social, que faí do tempo histórico un elemento perturbador para a validez da fonte; e a memoria popular ainda é máis débil en ambientes urbáns. En segundo lugar, son poucos os interlocutores válidos para este tipo de investigacións, dada a tremenda distorsión que, polo xeral, ofrece a memoria humana, non tanto dos feitos coma das interpretacións.

Con todo, as vantaxes da utilización deste recurso didáctico son evidentes. A realización e valoración deste tipo de experiencias, gracias ó traballo realizado polos propios estudiantes, permítelle unha aproximación á historia dunha maneira más real, propiciando unha necesaria renovación da didáctica da historia.

2. DESTINATARIOS

Esta proposta de traballo está concibida fundamentalmente para tra-

llar cos alumnos e alumnas do segundo ciclo da Educación Secundaria Obrigatoria. Así e todo, isto non debe supoñer ningún impedimento para que se utilice noutros niveis educativos, coas modificacións e adaptacións que sexan oportunas.

3. TEMAS DE INVESTIGACIÓN

Deben escollerse ben e interesar a cada grupo concreto de alumnos. O mellor tema é aquel que produce gran curiosidade e que capta inmediatamente a súa atención. A selección dos temas a traballar estará tamén en función da idade, e do propio obxectivo da investigación. Deben prepararse previamente os temas que se deben tocar na entrevista.

Poden ser temas de investigación os seguintes:

- Vida familiar: O fogar, a vivenda, mobles e enxoaval, traxes populares...
- A economía doméstica das familias campesiñas.
- As relacións sociais da comunitade.
- O traballo e os seus instrumentos, ferramentas e maquinaria (agricultura, industria, artesanía, etc.)
- Oficios e artes industriais.
- Oficios desaparecidos na localidade.
- Historia dunha industria.
- Artesanía local.
- Instrumentos de medida
- Medios de transporte.
- Costumes, tradicións e folclore.
- Bailes, xogos tradicionais e instrumentos musicais.
- Costumes populares relacionados coa saúde, coa cociña, cos oficios.
- Alimentación popular e pratos típicos.
- Menciña popular.
- Compara-lo estado da sanidade antes e agora.
- Vodas e enterros.
- Labores da muller. O traballo doméstico.
- Como se vivía antes de ...
- Vida escolar. A historia do centro educativo.
- Feiras e mercados. As feiras antigas da localidade.
- A reconstrucción das antigas festas populares (tanto relixiosas coma paganas), celebracións...
- Como se vestía a xente.

- Literatura popular: lendas, contos, refráns...
- Historia familiar dos alumnos.
- Algún aspecto concreto da historia máis recente do propio lugar, incluíndo os *grandes acontecementos* sociais e políticos: guerra civil, franquismo, transición democrática, etc
- A vida dalgún personaxe que viviu no pobo ou barrio e que foi moi coñecido polas xentes do lugar.
- Xogos e ocio.
- O núcleo urbano e as súas transformacións.
- A historia dunha determinada rúa.
- Toponímia.
- O idioma e variantes idiomáticas de carácter local.
- Etc.

4. ESTRUCTURA DA PROPOSTA

Motivación

Esta primeira fase do traballo adquire gran importancia, cando está ben planificada, porque nos permite desvela-las ideas e coñecementos previos dos nosos alumnos e alumnas, en relación cos novos contidos de aprendizaxe.

Podemos comenzar recollendo documentación gráfica que teñamos nas casas. Pedimos axuda a familiares e amigos.

Recollemos todo o material, ordeñámolo, escrivímos-los pés de foto correspondentes e elaboramos unha pequena exposición.

Facemos comentarios e unha lectura gráfica do material exposto:

- Identificación dos personaxes (idade, nome, extracto social, oficio,...)
- Actividades que están a realizar
- Tipo de roupa que utilizan (prendas de vestir e complementos)
- Obxectos e útiles que aparecen
- O lugar onde pudo ser tomada a foto
- Antigüidade das imaxes que estamos a ver
- Suxerencias sobre o contorno
- Observacións

Tamén sería interesante a recollida de obxectos, útiles e instrumentos “vellos”; pois o contacto directo con estes e o material gráfico sinalado anteriormente é un inmellorable punto de arranque para o afloramento de multitud de interrogantes que posibiliten a formulación de hipóteses en relación á época e ó tema escollido.

Etapas de utilización didáctica

1. *Introducción - Aproximación* ó tema que estamos a estudiar por medio dunha serie de actividades que posibiliten un certo coñecemento do tema sobre o que se vai realiza-la entrevista.

2. *Preparación da entrevista:*

En primeiro lugar, hai que selecciona-la persoa ou persoas ás que se lle vai realiza-la entrevista, poniéndose en contacto con elas. Pódense aproveita-los coñecementos que se teñan sobre esas persoas, tanto de profesores coma de alumnos. Elixidas as persoas, temos que tenta-la maior información posible sobre elas (quen son, idade, lugar de nacemento, forma de vida, orixes, ocupación súa e a-dos seus pais...).

A continuación hai que ensinar ós alumnos as técnicas más elementais de elaboración de enquisas, tanto en canto á súa elaboración coma no xeito de realiza-la mostra.

Tamén haberá que preparar previamente os nosos alumnos para que adquiran as destrezas necesarias para a realización de entrevistas. Para iso, podémonos servir dunha especie de *obradoiro-de iniciación*. Poden practicar entrevistando ós propios profesores, ós compañeiros, a membros da súa familia; ou intentar escribi-la súa propia autobiografía, a partir de documentos familiares, e entrevistarse uns ós outros, pero procurando que non se chegue nunca a unha exploración demasiado profunda

de situacións persoais, o que pode resultar unha experiencia prexudicial.

Débeselles igualmente ensinar a formular diferentes clases de preguntas; a crítica a outras entrevistas pode ser de gran utilidade. As gravacións de ditas entrevistas escóitanse e discútense no grupo, suscitándose cuestións sobre a fiabilidade da memoria, as omisións, a técnica da entrevista e a experiencia de ser entrevistado. É particularmente importante que a gravación da primeira entrevista sexa escotada e comentada, para darlle apoio ademais de consellos.

Non debemos traballar nin con "cuestionarios pechados", que poden chegar a ser excesivamente ríxidos, nin coa "conversa" libre, que nos pode levar a unhas liñas de indagación novas e moi interesantes, pero que, se non se saben controlar, dexeneran en contíneos anecdoticos e producen gran cantidade de material gravado totalmente inútil.

De tódolos xeitos, o erro máis grave que podemos cometer é ir a un modelo de pregunta-resposta, é dicir, obter respostas dunha ou dúas frases, e logo facer unha pregunta sobre outro tema totalmente distinto. Hai que tratar de tomar unha cuestión e extenderse nela.

As preguntas deben ser sempre o más claras e directas posíble, utilizando unha linguaxe usual. Non formularemos nunca preguntas complexas e dobles das que, polo xeral, só contestarán unha das partes, e probablemente non quedará

claro cal delas. Evitaremos formulacións que tendan a obter respuestas pouco claras. Ás veces, cando non obteñamos do informante a información precisa, haverá que repetí-la mesma pregunta varias veces de maneira diferente.

Por último, deberemos evitar especialmente formular preguntas persoais delicadas.

3. Realización das entrevistas

Para a realización da entrevista, cómpre ter presente os seguintes aspectos:

- Interese e respecto polas persoas en tanto que individuos, e flexibilidade para con elas.
- Capacidade para demostrar comprensión e simpatía cara ós seus puntos de vista.
- Boa predisposición para sentarse e saber escutar. Aqueles que non saibam calar, ou resistirse á tentación de contradici-las ideas do informante, levarán unha información carente de utilidade ou equívoca. Indicando os nosos propios puntos de vista, o máis probable é que obteñamos respuestas que o informante cre que nos gustaría escutar e que, polo tanto, serán pouco fiables.
- Hai que deixar que o noso informante poida expresarse libremente sen estar exposto a continuas interrupcións. Hai que saber manterse nun segundo plano tanto como sexa posible.

4. Transcripción do contido das gravacións:

É unha tarefa que leva moito tempo, pero ten a vantaxe de que, mentres que escoitar unha serie de cintas pode levar horas de traballo, olla-las transcripcións só require algúns minutos.

Un transcriptor ten que estar atento a que o contido das cintas sexa recoñrido con todo o seu sentido, expresando correctamente as pausas orais cos signos de puntuación axeitados.

Pódese abrevia-lo proceso reali-zando transcripcións abreviadas e selec-cionando as preguntas do cuestionario que o grupo de traballo considere máis importantes, o que supón unha solución intermedia entre a ficha de contido dunha gravación e a transcripción com-pleta.

O entrevistador sempre será a persoas máis idónea para realizar este tipo de actividade, alguén que poida completa-la transcripción coas indica-cións que recorde sobre o tono emprega-do, o humor con que se fixo tal comen-tario, vacilacións, etc., que ás veces son esenciais para a comprensión do docu-mento.

5. Elaboración de fichas-resume

sobre o contido das entrevistas.

A elaboración de fichas farase por duplicado. Unha irá a un ficheiro xeral que podemos ordenar alfabeticamente por temas, polo nome do informante...; a outra adxuntarémola á propia cinta.

Aforramos moito tempo se anotamos nas fichas a que páxinas da transcripción corresponde cada cara dunha cinta. Así, poderemos comprobar facilmente unha cinta ou unha transcripción; e estas

poden gardarse tamén por orde alfabética para facilita-la súa localización.

Un *modelo de ficha* podería se-lo seguinte:

Nome do INFORMANTE:	
ENDEREZO:	
LUGAR de gravación:	
Nome do ENTREVISTADOR:	
DATA na que se realizou a entrevista:	
Páxinas da transcripción	Notas de interese
Cara A:	
Cara B:	

Tamén pode interesar facer un extracto cos datos básicos sobre o informante, que poden axudar na valoración da propia entrevista.

Un exemplo podería se-lo seguinte:

Nome do INFORMANTE:	
Lugar de NACEMENTO:	ANO:
Profesión do pai:	
Profesión da nai:	
Número de irmáns:	
Estudios realizados:	
Empregos:	Anos
Actividades ou ideoloxía política:	
Relixión:	
Enderezos:	
Data de matrimonio:	Datas
Profesión do cónxuge:	
Fillos:	

Por último, poderíamos utilizar la técnica de *fichas de contido-resumo* das transcripcións realizadas, sobre todo

Nome do INFORMANTE:
ENDERECO:
DATA de realización da entrevista:
LUGAR:
Nome do ENTREVISTADOR.
TEMA:
RESUMO:

6. Realización dun informe post-entrevista que describa as condicións desta e que inclúa unha valoración e un estudio do discurso do testemuño.

Hai que pasar logo a interpreta-lo obxecto de estudio da entrevista, encadrándoo no momento histórico ó que fai referencia e tratando de razoar por que o comunicante o contou así, en función das propias vivencias, lembranzas, etc.

7. Audición e análise das gravacións no ámbito do grupo-clase.

Esta etapa permitíranos, por unha banda, a realización de discusións sobre a técnica emplegada nas entrevistas, e, por outra, a comparación e análise dos discursos dos diferentes testemuños orais utilizados (aquí vémo-la importancia de dispoñer das transcripcións, ainda que sexan parciais). E permitíranos tamén traballar con profundidade nos aspectos da subxectividade e a multiplicidade de factores que impulsan unha conducta.

cando estas son excesivamente longas.

Un exemplo pode ser o seguinte:

8. Comparación dos discursos dos entrevistados coas fontes escritas, directas ou indirectas. Utilizarémos o libro de texto para os nosos alumnos más novos, e algo de bibliografía ou incluso algúns fontes orixinais para os maiores. Con isto delimitámos o marco histórico no que se deron as experiencias e vivencias do testemuño, o tempo que podemos comprobar posibles olvidos, errores ou mentiras.

Os alumnos deben entender la necesidade de ser fieles ó que recolleron, atribuíndo á persoa que realmente o aportou.

9. Valoración da experiencia por parte do grupo-clase.

Consideracións Básicas para traballar con historia oral

A metodoloxía para esta actividade debe ser preparada polo profesor, atendendo ás seguintes características

- Nunca haberá un só interlocutor

- Elaboraranse cuestionarios cruzados que detecten as sombras ou distorsións da información que os alumnos necesitan para a súa investigación.

- Utilizaranse textos, documentos ou fotografías, que permitirán detectar deficiencias ou errores dalgúns testemuños orais. Ó ensinar ós nosos alumnos que os relatos dos adultos non son unha fonte de información incontestable (pola multiplicidade de puntos de vista), comezamos a mostrárlle-la relatividade das fontes históricas (as interpretacións históricas son subxectivas e, ás veces, contradictorias); e iniciámolos na necesidade de preguntarse pola veracidade do contido da fonte utilizada. Nunha palabra, estaremos favorecendo a aparición e desenvolvemento do seu espírito crítico.

- O método de traballo máis apropiado pode se-lo de mostraxe. Os aspectos que se estudien non necesitan unha orde determinada, e o procedemento máis eficaz é o traballo en grupo de tres ou catro persoas cun currículo que favoreza o traballo interdisciplinar.

- Os traballos con *historia oral* pódense combinar con fotografías, cartas e documentos, vestidos, ferramentas e outros obxectos para montar unha exposición. Poden presentarse tamén en forma de conferencias con elementos audiovisuais, ou publicarse como folletos ou artículos de prensa

- Sería tamén interesante, se fose posible, que as entrevistas se combinassen coa investigación nos arquivos e nos xornais locais

Recomendacións para os nosos alumnos

Existen algunas recomendacións xerais.

- O tema elixido debe se-lo suficientemente relevante para a comunidade na que estamos a traballar, así como suficientemente definido e localizado, evitando desde modo a dispersión na información que poidan ofrecer los nosos informantes. Non estaría de máis explicarllles a estes, moi brevemente, o propósito da nosa investigación.

- Hai que preparar previamente o tema da entrevista que se vai realizar, mediante lecturas ou por outros medios de información básica.

- A selección dos entrevistados estará en función de que poidan aportar información interesante e descoñecida para os nosos alumnos. O entrevistador vai aprender e, de feito, este espírito é o que consigue que a xente fale.

- En tanto ó equipo a utilizar, non estaría de máis, sobre todo se preveemos unha entrevista de longa duración, utilizar unha gravadora. Tamén pode ser interesante a utilización dun caderno para tomar notas soltas. Así e todo, a nosa atención deberá estar centrada sempre na información que nos proporcione o entrevistado.

- Non esquencermos la importancia dalgúns aspectos, como pode ser la necesidade de buscar un lugar para a entrevista onde o noso informante se sinte cómodo; ou a de crea-las condi-

cíons para que haxa en todo momento un clima agradable, de espontaneidade; valora-la posibilidade ou non da presencia doutras persoas na entrevista, co risco de inhibir esa espontaneidade pero coa vantaxe da aportación de correccións, estimula-la memoria...

- Ó remata-la entrevista, podemos aproveitar para engadir calquera comentario noso sobre o contexto en que se realizou, o carácter do informante, algunha indicación adicional, etc. A continuación, debemos etiqueta-la cinta e o estuche para evitar posibles perdas e,

por último, escoitaremo-la gravación para comprobar a información obtida e a que necesitamos ainda.

Actividades complementarias

Como complemento da actividade, pódese pensar nas seguintes opcións:

1) Organizar unha exposición a partir da recollida de útiles tradicionais.

2) Elaborar un ficheiro de vocabulario, para o que pode servir un modelo de ficha coma esta:

<u>Reverso</u>	<u>Anverso</u>
<ul style="list-style-type: none"> - Material: madeira - Forma: pirámide truncada - Posición: invertida - Uso: Deposita-lo gran para que caia no ollo da moa 	<p>Nome da peza: <u>Muxega</u></p> <p>DEBUXO</p>

- 3) Visitar un museo etnográfico
- 4) Traballar con textos e comics alusivos ó tema
- 5) Recoller literatura popular (contos, lendas, refráns...)
- 6) Elaborar e expoñer temas monográficos, utilizando material audiovisual variado.
- 7) Realizar audicións de música popular galega.
- 8) Elaborar comics sobre acontecementos e situacións da vida cotiá.
- 9) Investigar sobre a vida dun personaxe importante da comarca.
- 10) Construir murais
- 11) Preparar simulacións sobre unha escena da vida cotiá do contexto que estamos a traballar.

Valoración dos resultados e conclusións

Ó finaliza-la actividade, procede que:

a) Saquemos conclusións sobre o material recollido.

b) Realicemos, por grupos, un informe no que se faga unha aproximación comprensiva sobre como era a vida na época que estamos a traballar.

c) Elaboremos unha posta en común final

BIBLIOGRAFÍA

Abalo Garea, V (1985) "El papel del profesor", *Apuntes de Educación*, 18, 5-7

Carretero, M , e outros (1989) *La enseñanza de las Ciencias Sociales*, Madrid, Visor

Elias Jiménez-Ridruejo, M L (1987) "Un acercamiento al pasado próximo", *Cuadernos de Pedagogía*, 151, 64-67

Gil Saura, E , e T Peris Albentosa (1990) "Una proposta de indagació histórica a partir de fonts etnolóxiques i orais", *Didáctica de las ciencias experimentales y sociales*, 4, 31-42

Goetz, J P , e Lecompte, M D (1988) *Etnografía y diseño cualitativo en investigación educativa* Madrid, Morata

Luc, J N (1981) *La enseñanza de la historia a través del medio*, Madrid, Cincel-Kapeluz

Montesinos I Martínez, J (1989) "Métode científic i didáctica de les ciències socials", *Didáctica de las ciencias experimentales y sociales*, 2, 51-55

Olvera, F (1992) "La investigación, una propuesta alternativa", *Apuntes de Educación*, 1, 5-7

Pallaruelo, S (1988) "Trabajo etnográfico en las aulas", *Painorma*, 6, 43-47

Thompson, P (1988) *La voz del pasado Historia oral*, Valencia, Alfons el Magnánim

Zabala, A (1992) "Los proyectos de investigación del Medio", *Aula de Innovación Educativa*, 8, 17-23